

■ CONVIVENZA

L'erodinamica da barschuns da dents

DA VIOLA PFEIFFER*

Dacurt hai jau midà chassa. Ussa sun jau vidlonder da drizzar en tut tenor mes gust e da remplazzar las chaussas maltgiertas cun chaussas bellas. Quai funcziuna pulit bain. Enstagl d'in barschun e d'ina pala da plastic blaua hai jau uss in barschun da lain ed ina pala da metal. Mes deposit da palpìri vegl è ina bella chista da lain da fau e perfin il barschun da lavar giu pinc neon è vegnì remplazzà cun in da lain cun zaidlas natiralas.

Jau pudess pia esser dal tuttafatg ventiravla, sch'i na dess betg in object che disturba mes senn d'estetica en ina tala moda ch'i fa bunamain mal: mes barschun da dents! I na dat nagut ch'è uschè inestetico sco in barschun da dents. Propi. Tgi che na crai betg quai duess ina giada examinar in zic pli minuziusamain ses barschun da dents. Ed jau na discuro ussa betg da rests da pasta da dents u tochets da la davosa tschaina. Jau discuro da la simpla maltgiertad da quest object.

Ina curta descripciun: Ils blers barschuns da dents èn da plastic alv ed il moni ha ina curiosa furma erodinamica. Il plastic alv vegn traversà da lingias coloradas che accentuescha questa furma erodinamica. Las lingias han savens colurs pulit penetrantas sco blau cler, pinc neon u in verd toxic. Sch'ins cumpra in pachet da barschuns da dents survegn ins lura il pli savens in da mintga colur per ch'i na dettia betg scumbigls.

Per il solit han barschuns da dents er in tschert equipament che nagin na chapescha u dovra – quel è pia exact uschè inutil sco inestetico. Amez han barschuns



da dents per ordinari in stopper da gomma per il polesch, per che lez na ruschnia betg per sbagl en bucca durant lavar ils dents. Sco sche quai capitass. Jau na sai gea betg cun tge forzas che autra glied lava ils dents, ma insaco pens jau che questa precauziun è inutila.

Era la testa dal barschun da dents posseda in pèr aggiuntas inesteticas. Davos il barschun hai il blier ina surfatscha groppa. Dal pachetadi sai jau che questa surfatscha è per schubregiar la lieunga, ma jau n'hai anc mai udì dad insatgi che dovra propi quai. Suentar in'emprova, che fiss bunamain ida a fin cun ina stenschentada, poss jau era dir che jau na vegn mai pli a duvra questa funcziun supplementara.

Vinavant al barschun sez. Savens èn las zaidlas da differentas colurs, tendenzialmain da las medemas colurs ch'èn era sin il moni. Las zaidlas èn plinavant arranschadas en moda fitg speziala. Rudels, undas, lingias. Savens èn ellas era da differentes materials. Mintgatant han ellas perfin tochets da plastic extrem disgustus che duessan pulir ils dents durant ch'ins barschuna. Era qua met jau en dubi la funcziunalitad da questas «gummas».

Pertge sto pia in barschun da dents esser uschè

maltgiert? Pertge sto in barschun da dents esser erodinamico? Cler, barschunar ils dents sto schon ir spert, ma sto il barschun da dents perquai vesair ora sco ina racheta ch'ins sajetta lura gist sin il mars? E pertge sumeglia in barschun da dents cun sias furmas proporziunadas ed ils supplements da gomma plitost in dildo ch'ina furtgetta da fondue? Lezza chatsch'ins almain en la medema rusna – e betg d'emblidar, era las furtgettas da fondue han differentas colurs per ch'ins na scumbiglia betg ellas.

Jau na sai betg pertge che barschuns da dents ston esser uschè maltgierts u pertge ch'els èn erodinamics, però fin che insatgi ma po declerar quai, ponderesch jau seriusamain da lavar ils dents cun mes nov barschun da lavar giu – quel da lain e cun zaidlas natiralas. Quel va almain bain a prà cun mia nova stgaffa da bogh.

*** Viola Pfeiffer studegia germanistica, istorgia e rumantsch a l'Universitad da Turitg. Mintgatant lavura ella per la «Südostschweiz», mintgatant per il «teletext» e mintgatant sco scolasta, ma bunamain adina scriva ella.**

Vocabulari

barschun da dents – Zahnbürste
 maltgiert – hässlich
 pala da plastic – Plastikschaukel
 chista – Kiste
 lain da fau – Buchenholz
 zaidla natirala – Naturborste
 verd toxic – giftgrün
 scumbigl – Verwechslung
 polesch – Daumen
 ruschnar – rutschen
 precauziun – Vorsicht
 agiunta – Zusatz
 surfatscha groppa – raue Fläche
 pachetadi – Verpackung
 stenschentada – Ersticken, Erstickung
 moni – Stiel, Griff
 pulir ils dents – die Zähne polieren
 sajettar – schießen
 sumegliar – ähneln, gleichen
 furtgetta da fondue – Fonduegabel
 ir a prà – zueinander passen

Unterstützt von der
Lia Rumantscha



Lia Rumantscha